



La simulaziun mussa, co il «Lüschersee» pudess sa preschentar en il futur.

FOTO MAD



Uschia sa preschenta il territori a Lüschersee. Dal anteriur è be restà ina rusna.

FOTO VIAMALA TURISSEM

Il «Lüschersee» vegn emplenì

Oz cumenzan las lavurs per emplenir puspè il «Lüschersee». Passa tschient onns è il grond batschigl da quel «lai» sur Tschappina vid. La raschun: Ins sminava in connex cun las bovas tranter il Tavellas e Tschappina. Perquai han ins svidà il lai avant 111 onns. Ina revitalisaziun duess ussa purtar aua per ennavar il territori da skis da la Mantogna. Tenor las expertisas geologicas n'èsi da spetgar nagin augment da las bovas.

SANDRA BALZER/FMR

Dal lai natiral «Lüschersee» al nord dal Tavellas è be restà ina rusna. Il lai na datti betg pli dapi l'onn 1910. L'aua curriava da lez temp tras differentas deflussiuns sutterraneas ed ins sminava che quai stettia en stretg connex cun las bovas a Tschappina. Sin quai han ins construi ina gallaria, per che l'aua possa cular or dal batschigl dal lai.

Aua per las pistas

Ussa – 100 onns pli tard – vegn il «Lüschersee» puspè emplenì e l'aua da quel duess vegnir utilisada per ennavar las pistas da la Mantogna. Ils runals Tschappina/Mantogna han preni l'iniziativa: Oz, ils 20 da settember cumenza la revitalisaziun dal «Lüschersee». Tras la gallaria vegn tratg ina chanasaziun e la gallaria senza vegn serrada. In bajetg da radund 8 meters cubic a la fin da la gallaria procura per la controlla tecnica. I saja ina intervenziun minimala en la natira, di il president dals runals, Hanspeter Grass, envers la FMR. La construcziun dura radund 6 emnas. Per quest enviern na pon ins dentant anc betg utilisar l'aua per ennavar. Percunter duai l'aua da naiv (natirala) emplenir la proxima primavera il lai, uschia che l'aua pudess servir sco reserva per la stagiun 2022/23.

Rinforzar las bovas?

Tenor expertisas geologicas dals davos onns giugavan las deflussiuns sutterraneas – sut il «Lüschersee» – avant 100 onns be ina rolla subordinada en connex cun las bovas. Different

«Nus isolain differentes puncts e partin dal fatg, ch'il lai na perdia betg aua»

Hanspeter Grass, president dals runals

instruments vegnan ussa tuttina a mesurar l'installaziun futura. «In tschert risico avain nus tuttina. I pudess esser che las bovas s'intensiveschian. Quai chattain nus be ora cun la stupada da prova. Nus isolain differentes puncts e partin dal fatg, ch'il lai na perdia betg aua», di Hanspeter Grass. Quitads per las bovas hai era dà en il passà. In recurs privat ha numnadament impedì da survegnir tut las lubientschas.

Ins ha però pudì sclerir il cas, uschia che l'Uffizi per il svilup dal territori ha dà glisch verda. «L'agricultura, vischnanca, chantun ed indigens sustegnan il project», accentuescha Hanspeter Grass.

La gronda schanza

Per ils runals Tschappina/Heinzenberg è il «Lüschersee» ina gronda schanza. L'alternativa fiss in nov lai artificial. Quai na sappia ins però betg finanziar sco pitschna regiun da skis. «Nossas finanzas èn bunas e las investiziuns finanziain nus sez. Però in nov lai, quai na fiss betg finanziabel, perquai persequitain nus la revitalisaziun dal «Lüschersee», di Hanspeter Grass. L'entier project chaschuna custs tranter 600 000 e 650 000 francs. Quels portan per gronda part ils runals.

In project ecologic ed economic

Betg mo ils runals han in interess da revitalisar il «Lüschersee», mabain era il Parc natiral Beverin, che ha era sa participà als custs da planisaziun. Cun emplenir danovament il «Lüschersee» sa furma in nov spazi vital a l'aua. Cunzunt la vischinanza da la riva è in hotspot per la biodiversità. Different animals e flora pon puspè vegnir colonisads. Uschia ha il project ina valur economica e biologica, però valorisescha il lai er la cuntrada e rinforza il turissem da stad. Già ussa porscha il Parc natiral Beverin ina senda tematica che maina sper il lai vi e raquinta l'istorgia dal «Lüschersee». Il proxim pass duess mussar la regiun ed en spezial il «Lüschersee» en ses origin.